

2 Bheigtuvluv

Gevq-a nail gaq

Haoqgavq niil keiv iqmoeq ilmoeq bhai Gaqkhoel Bheigtuvluv aivq-i mail gevq-a nail ngaol dai, gevq-ai thaq nail ngaol. Al ovq-tavq, milnee uqnee khe Khali yaq juq jemao, Bheigtuvluv-i mail gevq-a nail ngaol dai, noeq nail ngaol.

Gevq-a nail aqyanq khi mail aqduq

Gevq-a nail aqyanq neq, A.D. 65-68 kovq nail gaiqlaq bhai ngaol. Gevq-a nail aqduq neq, Lolmav meenq bhai ngaol dai, noeq nail ngaol. Haoqgavq niil keiv neq, Bheigtuvluv aivq sil nail aqjail jail lal-u phao, gevq-a nail ngaol.

Khaq sil gaq bhai gevq bhiq-a nail

Haoqgavq niil keiv neq, 1 Bheigtuvluv haoq-gavq gevq bhiq-a nail juq bhai gevq bhiq thaq nail ngaol. Alheel ngel-i mail, haoqgavq niil keiv iqsanl khoeq nail jiovq nail bhai ya daq-a nail ngel-i mail, teevq gaq teevq phao tsaq pav tsaq sal-aivq khi jaol nail Miqyail-i mail tsel dov-ai thaq nail tsaol-aq bhai gevq bhiq-a nail ngaol.

Khul bhai noeqthunq khi gevq-a nail

Haoqgavq niil keiv neq, Khali yaq aqhaqlal phao eeq lal heel lal khi yovkav eeq lal dai, gaq bivq nail dai khi, gevq bhiq-a nail ngaol. Maq ngel nail pha q cavq nail cov nail juq bhai yaolphaol yaoq dai, ge noeq bhiq nail dai khi

mail iqsanl, gevq-a nail ngaol. Al ovqtavq, Heeqphaq Yeiqsul nvq pov teevq pov gaoq yavq kha lee nail bhai maq nioil peivq mail, neema thaqtsaol nail pha q ivq khi aqmeeq-ai daonq yaoq dai, cavq bhiq cov bhiq-a nail haoqgavq ngaol.

Iqmoeq ilmoeq khe daoq

¹ Ngal neq, Yeiqsul Khali nail yaqkav khi mail gaqkhoel pevq nail Silmoq Bheiqtuvluv ngaol. Miqyail khi mail Hevqkovq nail gaq pevq nail, Yeiqsul Khali nail tsaq nail daol nail pha q bha qda nee, nvjuq nail neema thaqtsaol nail pha q khe-ai dul nail aqphoiq kav deede e nail neema thaqtsaol nail pha q ya-ai tha q nail nuljuq jaol nail bha haoqgavq gevq bhoel-ai leevq-a nail ngaol.

² Miqyail khi mail ngadao nail Heeqphaq Yeiqsul bhai nuljuq heeq nia nail pha q bha qda nee, geeqlaoq eeljaol khi mail neesal-ovq nail pha q nuljuq nail lavqkhoel bhai mao lal dei-eiq.

Miqyail-i mail khul khi tsel dov-a nail ganl

³ Aivq nail seiqlaiq khaoqsail khi mee q dee bhee deede e nail pha q bhai juq khi ngadao bhai khul-a nail Miqyail bhai ngadao heeq kivq nail ngel-i mail, aivq bhai ev khi doevq kivq nail haqbhoil, ngadao loq nail pha q iqsanl mail, aivq nail ee q deede e nail bha qaoq ngadao bhai bivq lavq-a nail ngaol. ⁴ Alhai dul dai, aqphoiq kav khi ee q deede e nail aivq nail saljial juq ngadao bhai bivq lavq-a nail ngaol. Aqsi vq haqjoil nail

neekhaol bhaqda nee miltsaq kovtavq bhai luq-ail seil-ail nail phaḡ jiaḡ lal-a nail ngaol. Saljial al juḡ bhaqda nee, luq-ail seil-ail nail phaḡ bhai nuljuḡ ya jel-ail khi, Miḡyail neema thaḡ nail khe-ai, nuljuḡ iqsanl mail thaḡ nia lal nail ngaol.

⁵ Alheel ngel-i mail, nuljuḡ neema thaḡtsaol nail phaḡ bhai, aḡmeeḡ phaḡ nl nail bhai maol lal yaoḡ. Aḡmeeḡ phaḡ nl nail bhai neenoḡ neekha bhi maol lal yaoḡ. ⁶ Neenoḡ neekha bhai, yovḡḡavḡ nail neema bhai ḡaḡ lai nia nail phaḡ bhi maol lal yaoḡ. Yovḡḡavḡ nail neema bhai ḡaḡ lai nail phaḡ bhai, oltsaol nail phaḡ bhi maol lal yaoḡ. Oltsaol nail phaḡ bhai, Miḡyail bhai ev nail phaḡ bhi maol lal yaoḡ. ⁷ Miḡyail bhai ev nail phaḡ bhai, aḡivḡ jaḡbheḡ bhai ḡaiḡ-a nail phaḡ bhi maol lal yaoḡ. Aḡivḡ jaḡbheḡ bhai ḡaiḡ-a nail phaḡ bhai, ḡoil nail ḡaiḡ-a nail phaḡ bhi maol lal yaoḡ. Al juḡ nail haḡbhoil, laijai deedeḡ yaoḡ. ⁸ Niil juḡ nuljuḡ nail lavḡkhoel bhai aol nail nee ovḡtavḡ, maol lal thailthaiḡ haḡ neḡ, ngadao nail Heḡḡphaḡ Yeiqsul Khali bhai heḡ nia nail lavḡkhoel, nuljuḡ ḡanl tsoiḡ nail tsaol-aḡ pevḡ lal khi, aḡheḡ maodai heḡ lee nail ngaol.

⁹ Thailhai ngaol-aḡ, niil juḡ maḡ aol nail tsaol-aḡ neḡ, maivneev maḡ moel haol nia nail tsaol-aḡ khe-ai dul nail ngaol. Jel lal-u phao, aḡyu juḡ-i mail nl-a nail oḡḡbal juḡ bhai tsiḡhaol bhiḡ-a nail phaḡ bhai iqsanl, nioil peivḡ ḡil-a nail ngaol.

¹⁰ Alheel ngel-i mail, aḡivḡ jaḡbheḡ juḡ-ol, Miḡyail nuljuḡ bhai khul khi tsel dov-a nail phaḡ bhai ivḡ lal dai, laijai deedeḡ yaoḡ. Alhai nl haḡ neḡ, nuljuḡ teevḡ thal-iḡ maḡ ḡaḡ tsuḡ-ail. ¹¹ Alhai dul dai, ngadao nail Heḡḡphaḡ

khi mail Hevqkovq nail gaq pevq nail Yeiqsul Khali neq, nqmaq maqluv halyeel ivq nail aivq nail Milkhaoq lavqkhoel bhai, aivq nuljuq bhai lavqkhiq teevq tsail hav bhoel lavq nail ngaol.

¹² Alheel ngel-i mail, ganl niil juq bhai nuljuq heeq nia gil khi, yovqgavq-i mail ya-ai thaq nail maldil tsaq nail phaqaq nail lavqkhoel nuljuq ivqdao dai jaol khi ngaol-aq, ganl niil juq nuljuq bhai khaq mao iqsanl ge noeq bhiq nail ngaol.

¹³ Nuljuq ganl al juq bhai maq ya nioil peivq-ail dai, ngal khal doevq-u kev dai, nuljuq bhai ge noeq bhiq nail neq, tsaq nail ngaol dai, noeq nail ngaol. ¹⁴ Khul khi mail dai ngal-aq neq, ngadao nail Heeqphaq Yeiqsul Khali ngaq bhai bhaqlaoq kheq dai phaodaiq lavq-a nail khe-ai, maq maoq lal mail, ngaq nail aqmaol niilniai ya khaong ha-ail ceevq nail ngaol dai, ngal heeq kivq nail ngaol. ¹⁵ Ngal miltsaq kovtavq bhai maq jaol dai, pevq ail-u phao, nuljuq khaq mao iqsanl ganl al juq bhai noeq kev nia dai, niil aq-il, ngal laijai thailthaiq nail ngaol.

Yeiqsul nail seiqlaiq khaoqsail bhai ya moel-a nail ganl

¹⁶ Ngadao nail Heeqphaq Yeiqsul Khali nail bhaqaoq nail ganl khi mail aivq yavq kha lee nail ganl, nvjuq nuljuq bhai ge daiq bhiq-u phao, yu nail neenoeq neekha bhai juq khi ge dov-a nail gangje maq ngel-ail. Nvjuq neq, aivq nail eeq dee heel deede nail bhaqaoq bhai maivneev nee mail ya moel-a nail ngaol. ¹⁷ Aqbhu Miqyail aivq bhai tsiqeeq tsiqheel bhiq khi seiqlaiq khaoqsail bivq-a nail bhai nvjuq ya moel-a nail ngaol.

“Tsaol-aq niil gaq neq, ngal mailma-ail gaiq-a nail ngaq nail Yaqyov ngaol. Ngal aivq bhai neekhaol sil deedee naol” dai, aivq bhai ge bhiq-a nail seiqleiq khaoqsail teevq bhee aol nail eeq nail heel nail gaq nail aqthel bhai, nvjuq ya gaiq-a nail ngaol. ¹⁸ Nvjuq aivq nee mail meeq nail haol nail gaogjaoq kovtavq bhai jaol-u phao, nqtavq nee mail daoq al daoq alhai meel dov-ai leevq-a nail bhai ya gaiq-a nail ngaol.

¹⁹ Alheel ngel-i mail, nvjuq Miqyail nail haqbhoil gedan nail juq nail daoq bhai, neema thaqtsaol jaiq lal-a nail ngaol. Nuljuq iqsanl, nuljuq nail neema lavqkhoel nqbhaq bhaq lal khi, nqhao khe aqbhaq bhaq deedee nail aqgil maq dov lal-u phao kev dai, aqnav nail lavqkhoel bhaq nail phalmanq bhai juq nail khe-ai, Miqyail nail haqbhoil gedan nail al juq nail daoq bhai aqmeeq-ail naldaiq yaoq. ²⁰ Miqyail nail haqbhoil gedan nail juq-i mail Jalliq lavqkhoel bhai gevq-ai thaq nail daoq khul daoq maqkhaiq, yovqgavq bhai yovqgavq noeq dov nia nail maq ngel-ail dai, iqmoeq heeq kivq thaq-ai yaoq. ²¹ Khul khi mail dai ngal-aq, Miqyail nail haqbhoil gedan nail juq neq, yovqgavq bhai yovqgavq noeq dov khi ge nail maq ngel-ail. Meeqnail Haolnail Aqhaqlal aqyu juq bhai bhi noeq dov-a nail khe-ai, aqyu juq Miqyail nail daoq ge nail ngaol.

2

Maldil saqlaq maq ngel nail juq

1 Milnee uqnee khe, Yuldav tsaol-aq nail lavqkhoel Miqyail nail haqbhoil gedan naol dai ge khi ngaol-aoq, maldil maq ngel nail juq dov lal daiq-a nail ngaol. Alhai dul dai, niil aq-il, nuljuq nail lavqkhoel bhai iqsanl, maldil maq ngel nail saqlaq juq dov lal nail ngaol. Aqyu juq neq, yu bhai luq-ail seil-ail nail neema thaqtsoal nail phaqq oil bhoel khoiq lal nail ngaol. Aqyu juq neq, aqyu juq bhai ul kovq bhiq-a nail Heeqphaq bhai khaonq ha-a nail ngel-i mail, lavqtsail mail luq-ail seil-ail dai, yovqgavq bhai yovqgavq nl nail ngaol. ² Thailhai ngaol-aoq, aqyu juq haqev nail phaqq nl nail haoqnao tsaol-aq maodai tsaothel-aivq nail ngaol. Aqyu juq alhai nl nail bhaqda nee, maldil tsaq nail gailkhaol bhai yu ge doil nail ngaol. ³ Maq ngel nail saqlaq al juq, phul heel ildaqq maoqqaiq bhai maivjeel jeel nail ngel-i mail, aqyu juq nail haqbhoil jail jeq aol dai, nuljuq bhai goiqbhaoq bhaqq lal nail ngaol. Thailhai ngaol-aoq, aq-u nee mail Miqyail aqyu juq bhai dalceiv-ai thaqq nail al neq, aqnieivq-ail maq pevq-ail nia-ail. Aqyu juq maldil ya luq ya seil-ail nail ngaol.

⁴ Khul khi mail dai ngal-aq, oeqbal nl-a nail nqtavq gaqkhoel bhai iqsanl Miqyail maq phaiq-ail. Aqyu juq bhai daqqovq laoma bhai bavq bhoel khi, yalkhaq dal-u n-gaol kev dai, navtsee deel aqduq bhai hailcav-i mail pheethaiq khi laol-ai thaqq nail ngaol. ⁵ Milnee uqnee khe tsaol-aq bhai iqsanl, Miqyail maq phaiq-ail. Aivq bhai maq ev nail tsaol-aq bhai ulcuvq-i mail bhi deq pheeqq heivq gil-a nail ngaol. Thailhai ngaol-aoq, tsaqq nail daol nail ganl daqq cavq daqq cov cov-a nail

Nol-avq khi mail tsaol-aq sivq gaq bhai Miqyail bhi jel ail-a nail ngaol. ⁶ Saoldoq meenq khi mail Gaolmaollav meenq iqsanl, Miqyail miqjaq-i mail bhi poiv heivq gil-a nail ngaol. Yaqhao aivq bhai maq ev nail tsaol-aq juq bhi saol oil nail dai khi, aivq alhai yalkhaq dal bhiq-a nail ngaol.

⁷ Thailhai ngaol-aog, tsaol meeq tsaol haol Laoltavq bhai aivq bhi jel ail-a nail ngaol. Hageiv nail tsaol-aq al juq aqjiivq aqcavq pha q nail aol thaoq nail ngel-i mail, Laoltavq noeqhaq deede nail ngaol. ⁸ Khul khi mail dai ngal-aq, tsaol meeq tsaol haol al gaq, aqyu juq nee mail jaol-u phao, aqyu juq nl thail hal thailthaiq nail hageiv nail pha q bhai ya gaiq ya moel nail ngel-i mail, yaoq n yaoq n nee aivq nail neema lavqkhoel bhai maq khanqtsaol-ail. ⁹ Alheel ngel-i mail, Miqyail bhai ev nail tsaol-aq laonqdaiq nail pha q bhai ya daq-u phao, aqyu juq bhai khalhai ya bhi jel-ail nail dai, Miqyail heeq nia nail ngaol. Thailhai ngaol-aog, Yalkhaq dal-u n-gaol kev dai, aivq hageiv nail tsaol-aq bhai bhi jaol khi khoeq bhiq jio vq bhiq nail ngaol. ¹⁰ Aqjiivq aqcavq cavq nail aqsivq haqjoil nail neeno eq haoqnao tsaothe khi, Miqyail uvthaiq nail pha q bhai khal ge movq-ail ge nail juq bhai neq, yu nee maqtsil khoeq nail jio vq nail pha q bhai ya daq nail ngaol.

Maq ngel nail saqlaq al juq neq, geesil nail neema maq aol dai, yovqgavq nail neema khal noeq nail khe-ai, nl nail ngaol. Nqtavq khi miltsaq nail gaiqlaq bhai jaol nail bhaqaoq eeq nail juq bhai iqsanl, khal ge movq-ail ge tseq nail ngaol. ¹¹ Nqtavq gaqkhoel juq neq, aqyu

juq nee maqtsil gaq bhee jaiq khi, bhaqaoq eeq jaiq nail juq pevq khi ngaol-aoq, Heeqphaq Miqyail nail svtavq bhai, nqtavq khi miltsaq nail gaiqlaq bhai jaol nail juq bhai khal ge movq-ail maq ge nail nee ovqtavq, oeqbal maq thaq-ail. ¹² Thailhai ngaol-aoq, maq ngel nail saqlaq al juq neq, maq heeq nia nail phaqa bhai khal ge movq-ail ge doil nail ngaol. Aqyu juq neq, nieivq khi bhi deeq heivq jaq nail haqbhoil doevq lee-a nail khul maq saol-nvq nia dai, nl nail hal nail jaiqyaq khe-ai, dul nail ngaol. Haqtsoiq jaiqyaq bhai lav cov nail khe-ai, aqyu juq iqsanl, ya daq nail ngaol.

¹³ Maq tsaq maq daol nail phaqa nl nail bhaqda nee, maq tsaq maq daol nail phaqa ya daq nail ngaol. Aqyu juq neq, n-gaol phao iqsanl aljaiq jaq bov daol bov nail bhai lavqkhiq tsail deede nee nail ngaol. Aqyu juq nuljuq nee mail jaq tavq daol tavq-u phao, haqev nail phaqa bhai neekhaol teevq sil nl nail ngaol. Aqyu juq neq, nuljuq bhai bhi niaoq lal nail malyal khe-ai, dul nail ngaol. ¹⁴ Aqyu juq nail maivneev neq, yu nee mail bheeq movq nail neema aol nail ngaol. Aqyu juq neq, teevq thal-iq oeqbal nl bov nail maq bhao-ail. Aqyu juq neq, neema maq ivq nail tsaol-aq bhai jalmul mul nail nee ovqtavq, phul heel ildaog maogaiq bhai maivjeel jeel deede nee nail ngaol. Aqyu juq neq, Miqyail-i mail iqkhail yavq nail bhai ya daq nail juq ngaol. ¹⁵ Aqyu juq neq, gailkhaol aqdaol khaol bhai khaonq ha-ail ceevq khi, gail bheeq bheeq ail-a nail ngaol. Aqyu juq neq, Bhaolsaoq nail yaqyov Bhaqlaq nail aqkhill phaqaal haoqnao tsaothe thailthaiq

nail ngaol. Bhaqlaq neq, maq tsaq maq daol nail yalgaq aqphoiq ya movq deede-ai bhiq nail ngaol. ¹⁶ Aivq nail oeqbal bhaqda nee, khaq khaq-ail cavq nail cov nail bhai ya daq-a nail ngaol. Daoq maq ge nia nail aivq nail moeqphaq laljieiv tsaol-aq khe-ai, daoq ge dol lavq khi, Miqyail nail haqbhoil gedan nail tsaol-aq pevq nail Bhaqlaq-i mail naiquq khe-ai, nl nail phaqaq bhai lav naq-a nail ngaol.

¹⁷ Aqyu juq neq, tsil lai-a nail ulcuvq laolbev khi mail, lilmoel lil ma-i mail bhi oil jal-aivq-a nail nqdil khe-ai dul nail ngaol. Aqyu juq nail haqbhoil navtsee deel jaol duq Miqyail lav sav-ai thaqaq nail ngaol. ¹⁸ Khul khi mail dai ngal-aq, aqyu juq neq, khul teevq phaqaq-ail ganl maq tsoiq nail khaosail he nail daoq ge nail ngaol. Aqsivq haqjoil nail neekhaol teevq sil aqjivq aqcavq phaqaq nl nail bhai juq khi, gail bheeq bheeq nail tsaol-aq lavqkhoel nee dov lal nail dai khi, laijai thailthaiq nail juq bhai jalmul mul nail ngaol. ¹⁹ “Nuljuq yu nail yaqkav maq ya jiovq-ail” dai, ge bhiq khi ngaol-aq, aqyu juq neq, oeqbal nail kov-uvq bhai yaqkav jiovq thailthaiq nail ngaol. Khul khi mail dai ngal-aq, tsaol-aq bhai gaq lai nail khul phaqaq maqkhaiq, tsaol-aq neq, al phaqaq nail yaqkav jiovq thailthaiq nail ngaol. ²⁰ Tsaol-aq yaq neq, ngadao nail Heeqphaq khi mail Hevqkovq nail gaq pevq Yeiqsul Khali bhai heeq nia nail ngeli mail, miltsaq khe aqjivq aqcavq phaqaq nee, ya jel ail-a nail ngaol. Ya jel-ail khi ngaol-aq, aqjivq aqcavq nail lavqkhoel bhai gaoq aol-ail khi, gaoq bhi gaq lai haq neq, iqmoeq-u nee

maqtsil haoqnao naosaq neq, doil jaiq nail ngaol. ²¹ Aqyu juq neq, tsaq nail daol nail gailkhaol bhai heeq nia khi ngaol-aog, khaonq ha-ail ceevq khi, aqyu juq bhai bivq-ai thaq nail meeq nail haol nail aoldaoq kovqdaoq bhai iqsanl khaonq ha-ail ceevq haq neq, tsaq nail daol nail gailkhaol bhai heeq nia-a nail nee maqtsil, maq heeq nia nail neq, aqyu juq nail haqbbhoil meeq jaiq nail ngaol. ²² “Kheeq neq, aivq nail aogpeivq bhai aivq gaoq jaq kovq nail ngaol” dai, daoq daq daq nail daoq khi mail, “Wavq bhai aqmaol bhi jiiqv khi ngaol-aog, niaoq lao gaoq lao ail nail ngaol” dai, ge nail daoq daq daq nail daoq al daoq neq, aqyu juq nail haqbbhoil tsaq deedee nail ngaol.

3

Heeqphaq Yeiqsul yavq kha lee nail ganl

¹ Ngal mailma-ail gaiq-a nail aqtsaoq juq-ol, ngal nuljuq jaol nail bha gevq bhoel-ai leevq-a nail haoqgavq niil keiv neq, nvq keiv teevq keiv ngaol. Nuljuq aqmeeq-ai saol-nvq nia dai, ngal nuljuq bhai haoqgavq niil nvq keiv gevq bhoel-ai leevq khi, ge noeq bhiq nail ngaol. ² Miqyail nail haqbbhoil gedan nail meeq nail haol nail juq-i mail aq-u nee, gedan-ai thaq nail daoq bhai thaq nioil peivq dei-eiq. Heeqphaq khi mail Hevqkovq nail gaq pevq nail Yeiqsul neq, nuljuq bhai cavq nail gaqkhoel juq bhai juq khi, bivq-ai thaq nail daoq juq bhai iqsanl thaq nioil peivq dei-eiq.

³ Haoqnao naosaq khe aqn aqyanq niil nail lavqkhoel, yovqgavq nail aqsivq haqjoil

neekhaol nail haoqnao tsaothe khi khal ge movq-ail ge nail tsaol-aq juq dov lal nail ngaol dai, nuljuq iqmoeq heeq kivq nail tsaq nail ngaol. ⁴ Aqyu juq niailhai naldaiq lal nail ngaol: “Ngal yavq kha lee naol’ dai, Yeiqsul-i mail saljial jaq-ai thaq nail al khaq bha peivq gil ail-aoq thaq nail-aiq. Ngadao nail aqphiq aqbhal juq iqsanl sil gil-aoq nail ngaol. Thailhai ngaol-aoq, miltsaq teivq-u n-gaol nee mail yanggaol kev dai, yaoq pha q yaoq-ao nee maq phal lal-a nail maq ngel-ail lai q” dai, ge lal nail ngaol. ⁵ Milnee uqnee nee mail Miqyail nail daoq bhaqda nee nqtavq jia v lal-a nail bhai, aqyu juq nioil peivq movq nail ngaol. Al ovqtavq, Miqyail nail daoq bhaqda nee, ulcuvq nee mail miltsaq dov lal khi, ulcuvq bhaqda nee miltsaq pevq lal-a nail ganl iqsanl, aqyu juq nioil peivq movq nail ngaol. ⁶ Milnee uqnee nee miltsaq bhai ulcuvq bhi deq phee q lal khi, tsaol-aq bhai lav luq lav seil-a nail ngaol. ⁷ Miqyail nail daoq al neq, niil aq-il jia v thailthai q nail nqtavq khi miltsaq bhai, miqja q kheq ha nail haqbhoil lainq-ai tha q nail ngaol. Miqyail bhai ma q ev nail tsaol-aq bhai yalkha q dal khi lav luq lav seil-u n-gaol kev dai, lainq-ai tha q nail ngaol. ⁸ Ngal mao-ail gaiq-a nail aqtsaoq juq-ol, daoq niil daoq bhai tha q nioil peivq dei-eiq. Heeqpha q Miqyail nail sivtavq bhai, teevq n khi teevq hinl kovq neq, khul ma q bhee q-n-ail. ⁹ Miqyail-i mail jaq-ai tha q nail saljial bhai aivq lavqtsail mail ma q bhi bhee lal-il dai, tsaol-aq teevq pav ganav juq noeq thailthai q nail ngaol. Aivq lavqtsail mail ma q bhi bhee lal nail ma q ngel-ail. Tsaol-aq teevq ga q-ail ma q luq ma q seil-ail dai, tsaol-aq

iqsanl mail oeqbal noeqpov lal nail bhai, aivq oil movq nail ngel-i mail, nuljuq bhai aivq ol lavq nail ngaol.

¹⁰ Khoiqbhaoq bhaoq lal nail aqyanq maq heeq kivq nail khe-ai, Heeqphaq Yeiqsul nail aqn kev lee nail ngaol. Aq-u n-gaol, nqtavq aqthel mailma-ail meel meel-ail peivq-ail nail ngaol. Aqlaol laol deedee nail ngel-i mail, nlma bhala aqgil iqsanl mail, pha q gil lai nail ngaol. Miltsaq khi miltsaq kovtavq bhai khal jiav nail iqsanl mail poiv ha gil nail ngaol.

¹¹⁻¹² Al juq iqsanl mail pha q gil-ail nail ngaol dai, heeq kivq nail ngel-i mail, nuljuq Miqyail nail aqn bhai noeqthunq khi daonq thailthaiq-u phao, aqmeeq aqhaol haol dai, taivq-ail doevq khi, Miqyail bhai ev nail tsaol-aq pevq heeq pha q-ail tsa q nail ma q ngel ail laiq. Aqn al n kev lee ha q neq, nqtavq bha miqjaq-i mail poiv ha khi, aqlaol laol deedee nail ngel-i mail, yaoq pha q yaoq-ao nee pha q gil lai nail ngaol.

¹³ Thailhai ngaol-aq, Miqyail-i mail saljial jaq-ai tha q nail khe-ai, nqtavq aqsivq miltsaq aqsivq jiav lal nail ngaol dai, ngadao noeqthunq khi daonq nail ngaol. Al bhai neq, tsa q nail daol nail pha q taivq-ail jiav nail ngaol.

¹⁴ Alheel ngel-i mail, ngal mao-ail gaiq-a nail aqtsaoq juq-ol, nuljuq al juq bhai noeqthunq khi daonq nail ngel-i mail, nuljuq aqjiivq aqcavq pha q ma q leivq mail, oeqbal tha q duq iqsanl ma q jiav nail lavqkhoel nee, Miqyail nail sivtavq bhai neesal-ovq nail lavqkhoel bhai ya jaol dai, laijai yaoq. ¹⁵ Ngadao hevqkovq nail pha q ya dai, ngadao nail Heeqphaq Miqyail ol thailthaiq

nail ngaol dai, heeq kivq thaq-ai yaoq. Ngadao mao-ail gaiq-a nail aqivq jaqbheq Paolluv iqsanl, Miqyail aivq bhai neenoq neekha bivq-a nail khe-ai, ganl nil juq nuljuq bhai haoqgavq gevq bhoel-ai leevq-a nail ngaol. ¹⁶ Aivq-i mail gevq-a nail haoqgavq iqsanl nail lavqkhoel-ai, ganl nil juq aivq gevq-a nail ngaol. Haoqgavq al juq nail lavqkhoel-ai ganl teevq pav ganav juq neq, gov heeq lal nail haq nail ngaol. Maq heeq nia-ail neema maq ivq nail tsaol-aq neq, gov heeq lal nail haq nail daoq al juq bhai maqkhaiq, Jalliq yaoq juq yaoq nail lavqkhoel bhai gevq bhoel-ai thaq nail daoq juq bhai maqkhaiq, daoqceevq lav phal nail ngaol. Aqyu juq alhai nl nail ngel-i mail, ya luq ya seil-ail nail ngaol.

¹⁷ Alheel ngel-i mail, ngal mao-ail gaiq-a nail aqtsaoq juq-ol, nuljuq iqmoeq-u nee mail ganl nil juq heeq nia nail ngel-i mail, haqev nail tsaol-aq nl bheeq nail haoqnao aqyu juq nuljuq bhai maq ya hevq bheel-aivq mail, yovqgavq ivqdao dai, thulphaol-nvq thaq nail bhai maq ya tsu-ail dai, yaolphaol yaoq. ¹⁸ Ngadao nail Heeqphaq khi Hevqkovq nail gaq pevq nail Yeiqsul Khali nail geeqlaoq eeljaol nail lavqkhoel nee maqkhaiq, aivq bhai heeq nia nail lavqkhoel nee mail maqkhaiq, nuljuq eeq lal moe lal yaoq. Nil aq-il nee, nqmaq maqluv halyeel aivq bhai tsiqeeq tsiqheel bhel. Aqmiq.

Jalliq aqsivq Gaolkheel daoq
Akeu: Jalliq aqsivq Gaolkheel daoq New Testament
copyright © 2015 Wycliffe Bible Translators, Inc.

Language: Gaolkheel (Akeu)

Contributor: Wycliffe Bible Translators, Inc.

All rights reserved.

2020-11-13

PDF generated using Haiola and XeLaTeX on 21 Feb 2024 from source
files dated 29 Jan 2022
aaaba9fd-8172-55cc-ad15-906f43ddb5a5